

REGIONAL NEWS

CYMA

Thla hmasa August Ni 2 atanga tun thla ni 5 inkar chhung khan Central YMA ruihhlo heroin hawng 122 leh tic tac bur 307 an man.

Central YMA hotute hnen atanga Akashvani Aizawl thudawn danin heng ruihhlo kaihhnawihah hian mi 289 man an ni a, man zinga 169 te chu counseling pek an ni a. Excise & Narcotics hnenah mi 22 pek an ni baw a ni. Central YMA hian hemi hun chhung hian heroin bakah ruihtheihthil dang, ruih nana hman thin damdawi, codeine bur 2,689 ,Ganga kg 12 leh gram 230 an man baw a, heng bakah hian Ruihna dang Pregabalin, NAP 10, Alphazolam, Tramadol, Tumispas leh a dangte an man tel baw a ni.

Thla hmasa ni 25 khan Central YMA leh Mizoram Police IGP Pu H. Ramthlenglina te chuan Mizoram sorkarin ruihhlo do beihpui, Special Drive on Drugs a thlak tur chungchangah Myanmar leh India ram inrina Tiau lui atanga Mizorama ruihhlo lo luhna khua zawng zawng fang chhuak tawhin, khawtlang hruaitute nen inkawmhona hun an hmang a. Tun thla tir, September ni 2 khan Central YMA leh Mizoram State Legal Services Authority te chuan Aizawl khawpui chhunga Branch YMA hruaitute tan dan zirtirna hun an buatsaih baw a ni.

<><><>

MALARIA, DENGUE

Kumin thla sarih chhung (January atanga July) khan Mizoramah sikserh (malaria) natna vangin mi 6 an thi.

Health & family welfare department a national vector borne diseases control programme (NVBDCP) hotute sawi danin kumin chhung hian sikserh vei mi 6,119 hmuhchhuah a ni a. An zinga mi 5 malaria Pf veite chuan an thihphah a, malaria PV vei pakhat a thi baw a. Mizorama sikserh vei tam berna te chu ramri hnaih lam a ni a, a bikin Lawngtlai, Lunglei leh Mamit district-ah te sikserh hri kai an tam zual a. Sikserh natna avang hian kum nga kal ta chhung (kum 2020 atang) khan mi 46-in an thihphah tawh a. Nikum chhung pawh khan sikserh vei mi 16,899 hmuhchhuah zinga 7 an thi a ni.

Hetih lai hian Dengue natna thihpui kuminah Mizoramah an la awm lo na chungin a hri kai erawh chu 783 hmuhchhuah a ni a. Kum 2012 a Mizorama Dengue hri kai mi 6 hmuhchhuah a nih atang khan nikum thlengin he hri avang hian mi 8 an thi tawh a. Thi an tam ber kum chu kum 2022 kha a ni a, hemi kum hian mi 1,868-in Dengue hri kai-in mi 5 an thi a. A kum leh, 2023 khan mi 2 thi-in nikum khan 1 a thi leh a. Dengue vanga thite hi Aizawl district ami vek an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zandin dar 6 leh a chanve-ah Chanchinthar puan leh a ni ang.

<><><>

DISASTER

Tukin zing dar 7:00 vela Chhungte khaw hnuaia kawng lung tla-in kawngpui a hnawh leh chu khawl hmangin darkar khat vel chhungin thenfai ani.

Champhai to Aizawl NH-06 hi Chhungte khaw hnuaia hian vawi duai lo leimin leh lung tla in kawngpui hi a hnawh ping thin a. Ruah a sur tam deuh chuan eng hunah pawh ping leh thei dinhmunah a ding reng a. Kawng siamtute'n khawl hmangin an vil reng a ni.

Puan tawh angin Zirtawpni chawhnu leh zan lama ruah sur nasa avangin Champhai Vengsangah leimin,Leivung tawlh leh Lungrem chim avangin hmun thumah chhiatna a thleng a.

Zirtawpni zan khan Champhai Vengsang Village disaster management Committee kaihhruaina in In chhia te buangrua leh mutbu te seng hawin ghal a ni a. Nimin khan khawtlang huapin an hnattlang baw. Zirtawpni chawhnu lama ruah sur nasa avangin Vengsang UPC biak in lungrem chim chuan a thlanga Pu.T.Lalzarmawia te chenna In hmun thenkhat tichhiain anni hi Rs.6,500/- DM&R atangin tanpuina pek a ni ang. Pu T.Lalzarmawia te In kianga Pi Lalrinawmi te chhungkaw chenna In chu luah zui tlak lohva a chhiat vek avangin cheng nuai 1,30,000/- DM&R atangin pek a ni ang.

Zirtawmi zana dar 9:00 vela Champhai Vengsang Assam Rifles tlang atanga leivung leh chirh luang thla in Pi Vanhlupuii te chenna in a hnawl chhiat pawh DM & R atangin Rs.1,30,000/- pek a ni ang.

<><><>

ARSON

Nizan dar 8 ruk hma deuh khan Kolasib District chhung Bukvannei khua a Pu Lalrinmawia In, Assam type chu a kang a, a kan ral hma in mipui pungkawmin an thelh hman a, mihring thi leh hlaim an awm lo.

Pu Lalrinmawia hi a fapa kum 11 vel mi nen a khawsa niin, In kan lai hian an pafa hian an thiante In ah chaw an ei a. In kan chhan hi hriat ni lo mahse, an mei chhemna thuk atanga chhuak ni a rin a ni. In hi a kang chhe nasa hle a, a bang tile leh a chung rangva te a kang chhia a, a skirting leirawhchan erawh a kang chhe lo ni a hriat ani. He in hi sorkar laipui hnuaia mirethei In sak tanpuina sum hmanga sak niin, a chhuat cement, a bang dap ,a chung rangva a ni a. In kang hi khawtlanga mi tlawmngai kal khawm te'n theihtawp chhuahin thelh tum mah se, a kan nasat hman avangin duh angin thelh theih a ni lova, an bungrua pawh a kang chhe nasa hle ni in thudawn ani.

<><><>

MODI-MACRON EXCHANGES VIEWS

Prime Minister Narendra Modi-a leh France President Emmanuel Macron-a ten Ukraine buaina a tawp thuai theih dan tur chungchang bakah khawvel huap thil pawimawh chi hrang hrang telephone-ah an sawi dun a, Pu Modi-a chuan harsatna reng reng, tharum tel lova chinfel chu India duh dan a ni reng tih a hrilh a, India leh France inkungkaihna nghet tak chu khawvela remna leh ngelnghehna a awm theih nan a pawimawh tih a sawi bawk.

Prime Minister hian European Council President, Antonio Costa leh European Commission President, Ursula von der Leyen-i te pawh a bia a ni.

<><><>